



Matagaluega o Meli ma Fesootaiga



1999 - 2000



Uluai Lipoti Faa-le-Tausaga



Faalaetau mai le Afioga i le Minisita o Meli ma Fesootaiga:

Na faavaeina le Matagaluega o Meli ma Fesootaiga i le aso muamua o Iulai 1999, i lalo o aiaiga o le Tulafono Autu o Auaunaga tau Meli ma Fesootaiga 1999. O le Lipoti Faale-tausaga muamua lenei a le Matagaluega.

O le faavaeina o le Matagaluega o Meli ma Fesootaiga o se vaega o le faaauauina o faatinoga o le fuafuaga ma le naunautaga o le Malo ina ia saga faamalosiiina pea Aiaiga Faavae ma Tulafono Faatonutonu, lea e mafai ona faavaeina ai ma faatumauiina le atinaega o fesootaiga a le atunuu. O auaunaga tau meli ma fesootaiga e iai lo la sao taua tele i le atinaeina o le tamaoaiga faapea foi ma le soifuaga lautele o le atunuu. O le ala lea e tatau ai lava ona tuueseeseina le pulega ma le faatinoga o ia matafai o Aiaiga Faavae ma Tulafono Faatonutonu mai le fafoega o meli ma telefoni ina ia mafai ai ona maua se tulaga faaleleia o le faatinoga o ia auaunaga faatasi ma lo laua atinaega.

O se tulaga fiafia foi ua maitauina ai le galulue faatasi o le Malo ma le Auaunaga, ma o le a agai pea ina mautu le galulue faipaaga a le Matagaluega o Meli ma Fesootaiga ma i latou uma lava o loo aafia i lenei auaunaga aua le faatinoina o a latou matafai o fesootaiga, lea e faaono mautinoa ai le taugofie, sili ona lelei ma le faatuatuaina o le auaunaga tau fesootaiga mo tagata o Samoa, o se tulaga taua tele lea ua tuuina iai le faamuamua. O loo faamalosiaua pea le Malo i le galuega soosootauau, ua avea o se metotia e faatinoina ai se faiga faavae moni a le atunuu lava ia, aua le faalauteleina o le atinae i le auaunaga tau Meli ma Fesootaiga i Samoa.

Ua faagasolo galuega a le Matagaluega i lona uluai tausaga o galuega faatino, aua le faavaeina ma le atinaeina atili o Tulafono Faatonutonu ma se Aiaiga Faavae mautu aua le auaunaga tau Fesootaiga. O le televave o suiga faa-nei-onapo i masini ma faiga tau fesootaiga i le lalolagi, ua saga aafia ai pea le auaunaga ma le atinaeina lelei i auaunaga tau meli ma fesootaiga i atunuu tauatia'e e aofia ai ma Samoa. O tuutuuga fou aua le atinaeina o fesootaiga e pei ona ua faatinoina nei, o loo atagia ai le naunautaga o le Malo e laa faatatau pea i se tulaga talafeagai ma nei suiga i metotia tau fesootaiga aua se manuia mo Samoa.

O se faamoemoega autu i le Vaaiga i le lumanai a le Matagaluega o le faamalosiaua lea aua le atinaeina o fesootaiga faapea ma faiga e feaveai ai faamatalaga aua le faaleleia atili o le faagasologa o olaga o tagatanuu uma o le atunuu.

O le mea lea e ia te a'u le fiafia ma le faagaetia ou te tuuina atu ai le Uluai Lipoti lenei o Galuega faatino a le Matagaluega o Meli ma Fesootaiga mo le piriota mai le aso 1 Iulai 1999 seia oo mai i le aso 31 Iuni 2000.

Tuilaepa Sailele Malielegaoi

PALEMIA MA LE MINISITA O MATAUPU TAU MELI MA FESOOTAIGA



Lau Afioga i le Minisita o Meli ma Fesootaiga

Ou te fiafia lava e tuuina atu le Ripoti muamua lenei faa-le-Tausaga a le Matagaluega o Meli ma Fesootaiga mo le vaitaimi mai ia Iulai 1999 ia Iuni 2000.

O lenei Ripoti ua faailoga ai le atoaga o le tausaga muamua talu ona faavaeina le Matagaluega, ina ua pasia le Tulafono o Meli ma Fesootaiga 1999, ma soloia ai le Matagaluega o Falemeli na iai muamua. Na faavaeina ai foi mai aiaiga o lea lava Tulafono, le Kamupani fou o le Samoa Communications Limited, (SCL). O se Kamupani a le Malo, e faavaeina i lalo o le Tulafono o Kamupani, ma e gafa ma le faatinoina o auaunaga e ala i Meli ma Fesootaiga i telefoni mo le atunuu.

O lenei Ripoti o loo talanoaina ai galuega faatino a le Matagaluega i lona tausaga muamua. O loo taua ai le faataotoga o ana galuega ma lana matafaioi faatulafonoina, ma o loo faailoaina ai foi ni faamatalaga e faatatau i le atinaeina mai o le auaunaga i meli ma fesootaiga i le sefulu tausaga talu ai a'o lei faavaeina mai lenei Matagaluega fou.

I le faaiuga o lenei Lipoti o loo faamatalaina ai ni fuafuaga atiae maoti mo le matafaioi a le Matagaluega i le lumanai, e faavaeina i Fuafuaga Toe Faaleleia a le Malo, o loo ua amata faatinoina nei i galuega a le Malo.

O ni vaega tupe na vavaeina mai le Tala Autu o le Tupe na pasia e le Palemene mo le Matagaluega o Falemeli na iai muamua, mo le tausaga faaletupe mai ia Iulai 1999 ia Iuni 2000, na mafai ai ona faatino le faatuina ma le amatalia o galuega ma le matafaioi a lenei Matagaluega fou o Meli ma Fesootaiga. O le tele o lenei vaega tupe na faaaogaina mo le galuega faatino a le Kamupani o le Samoa Communications Limited.

Faafetai,

Sapa'u Ruperake Petaia
FAATONUSILI O MELI MA FESOOTAIGA

1. Matafaioi a le Matagaluega

Ua faavaeina le Matagaluega o Meli ma Fesootaiga i lalo o le Tulafono mo Auaunaga tau Meli ma Fesootaiga 1999, o loo faamatala auiliili mai ai Matafaioi a lenei Matagaluega e faapea:

1. O le a tauaveina e le Matagaluega ni Matafaioi e pei ona o le a talafeagai mo le Faatinoina ma le faafoeina lelei o lenei Tulafono ma isi Tulafono o loo faafoeina e le Matagaluega, ma mo le atiaeina o se faiga faavae aupito i sili ona lelei ma talafeagai mo pisinisi i totonu o Samoa.
2. E aunoa ma le faatapulaaina o Matafaioi aoao e pei ona faamatalaina i totonu o le fuaiupu (1) o le Matagaluega o le a tatau ona iai matafaioi e faapea –
 - (a) Le tuuina atu o fautuaga tau faiga faavae i mataupu uma faasino i aiaiga
O galuega faatino tau meli ma fesootaiga;
 - (e) Le mataituina o le aiaiga o galuega faatino tau meli ma fesootaiga;
 - (i) Le fautuaina o le Minisita i mataupu uma faasino i le faamatuu atu ma le faagaoioiga o laisene mo le tuuina atu o galuega tau meli ma fesootaiga;
 - (o) Le faamalositia ma le uunaia o le tuuina atu ma le mauaina pea o galuega aupito i sili ona lelei ma taugofie tau meli ma fesootaiga i tagata o le atunuu;
 - (u) Ia fesoasoani i le faavaeina o se siosiomaga e mafai ona faatonutonuina, o le a mafai ai ona atiina a'e galuega tau meli ma fesootaiga i totonu o Samoa i se tulaga lelei, faatauva ma e mafai ona tali atu i manaoga o tagata lautele;
 - (f) Ia fautuaina tulaga masani faa-tekonolosi o galuega tau meli ma fesootaiga o loo Maua i totonu o Samoa ma pe faamata o ia galuega ua lava ma sologa lelei mo le alualu i luma e tusa ai ma galuega faatino o loo mauaina i fafo atu o Samoa; ma
 - (g) Le fautuaina o soo se atinae i alamanuia tau meli ma fesootaiga.



2. O le Sini Vaaia ma le Faasinomaga o le Matagaluega

Ua tautinoina e le Matagaluega o Meli ma

Fesootaiga le avea ma ana **Sini Vaaia**, le faanaunauga na te taitaiina

Le foafoaga ma le atinaeina o

Le Aiaiga Faavae mo galuega tau Fesootaiga, e maua ai

Le tulaga silisili ona anagata, le lagona taulamua i taumafaiga lelei ma se

Auaunaga e talimana'o i galuega tau meli ma fesootaiga

Aua tagata Samoa.

O lona **Faasinomaga** ina ia galulue faatasi ma i

Latou uma o e aafia i lenei auunaga, aua le atina'eina,

O auunaga tau fesootaiga e tali manao,

Faamoemoeina ma ia talafeagai le tau

Mo tagata uma o Samoa.

3. Nofoga Fou mo le Ofisa o le Matagaluega

Na faatonuina le Matagaluega fou lenei ina ia sailia sona nofoaga fou ae faaavanoa le Falemeli tuai i Matafele ma ona lala uma mo le Kamupani fou a le Samoa Communications Limited. Ona o le tulaga faananati o le faaavanoaina o le Falemeli tuai mo le Kamupani fou o lea na faananati ai foi ona sailia se nofoaga mo le Matagaluega, ma maua ai loa le avanoa i le Fale fou o le Chan Mow Plaza i Savalalo. O lenei faaiuga na faavaeina lava ina ua mautinoa le tulaga taugofie o le lisi ma le talafeagai foi o lea Fale fou mo le faamoemoe o le Matagaluega.



4. Aufaigaluega Amata mo le Matagaluega

E sefuluono(16) le aofai o le aufaigaluega na faavaeina lenei Matagaluega. E sefulutasi (11) e faigaluega tumau ae to'afa (4) e togiaso. O le to'aiva (9) o lenei aufaigaluega sa faigaluega muamua i le Matagaluega o Falemeli na iai muamua, ae ua faia la latou faaiuga e faaauau la latou auaunaga i le Matagaluega fou o Meli ma Fesootaiga ina ua suia pulega i le aso 1 Iulai 1999.

Na toe tofia le Faatonusili o le Matagaluega o Falemeli na iai muamua, e faauluulu iai le Matagaluega fou i se tulaga le tumau mo se vaitaimi e tusa ma le ono masina. Ina ua mavae le ono masina ona faasalalauina ai lea o lea avanoa ma toe tofia ai le na tofia i le tulaga le tumau, i lea lava avanoa i se aiaiga faakonekarate mo le tolu tausaga.

E lua foi ni faatonusili lagolago na tofia ia Ianuari 2000, e faauluulu iai vaega o Aiaiga Faavae (Policy Division), ma le Laisene ma le Mataituina (Licensing and Monitoring Division).



5. Faamaopoopoga

E tolu vaega autu ua faamaopoopoina iai le Matagaluega:

1. Vaega mo le Aiaiga Faavae
2. Vaega mo Laisene ma le Maitauina
3. Vaega mo galuega fesoasoani

E faamaopoopo i ia vaega le matafaioi mo le Vaega o Pulega o Alaleo Leitio (Spectrum Management Agency). O lea foi vaega o le auunaga na faavaeina i le Tulafono mo Auunaga tau Meli ma Fesootaiga 1999. O se galuega faaopoopo lea mo le aufaigaluega a le Matagaluega, ua faatinoina ona o lana matafaioi lautele mo le vaaia ma le faafoeina lelei o galuega e pei ona faatonuina ai i le Tulafono faavae ua taua I luga. O lea faatinoga ua faia e talitali ai le tofia o se aufaigaluega e feagai ma lea matafaioi.

5.1 Vaega mo Aiaiga Faavae:

O le matafaioi autu a le Matagaluega o le faaleleia poo le atinaeina o le Aiaiga Faavae a le Malo mo le atinaeina o mataupu tau fesootaiga i le atunuu. O le faafoeina o lea galuega e manaomia ai le Matagaluega ina ia faatinoina ni suesuega maumaututu ma ia asiasia le faatinoga o nei auunaga e kamupani o loo latou faatinoina. O ia faamatalaga ma faamaumauga o le a mafai ona iloilo ina ma tuuina atu faafautuaga i le malo ae maise i vaega o loo aafia ai lea Aiaiga Faavae mo Fesootaiga.

O le atinaeina o leni Faiga Faavae, e manaomia ai leni vaega e sailia manaoga o tagata lautele mo auunaga tau fesootaiga, e tataua ona tuuina atu e le Malo. E manaomia ai foi le fuafuaina lelei o le auunaga a le Malo e tali atu i nei manaoga mo auunaga tau fesootaiga mo Samoa.

O lea galuega e manaomia ai foi le fuafuaina o avanoa mo le auunaga tau telefoni ma le meli o loo faasoina i le atunuu, ma le maitauina o faafitauli o loo afaina ai le tulaga lelei aua le tali atu i manaoga o tagata lautele. E le gata i lea ae o le tosina o isi ituaiga o faiga ma masini fou mo fesootaiga, e manaomia ai le iloilo ina totoa o itu e mafai ona aoga faapea foi ma ni o latou itu faaletonu, ma ni auala e mafai ai ona fesoasoani ma faamalieina le manao o loo iai i le maketi i Samoa nei.

E feagai foi leni vaega ma le aoina mai o tali ma faamatalaga e tuuina mai tagata lautele, e mafai ai ona fuaina le tulaga lelei o loo iai le galuega a kamupani o loo faatinoina nei auunaga tau fesootaiga, ma e mafai ai foi ona mautinoa se sao o tagata lautele i leni galuega aua le faaatoatoaina o le Aiaiga Faavae mo Fesootaiga. E manaomia foi le faatusatusaina o leni faamatalaga ma faamatalaga mai isi atunuu e faaono tutusa lo latou tamaoaiga ma lo latou soifuaga lautele ma Samoa nei, e mafai ai ona maua se ata lautele faa va o malo, o le tulaga o loo iai le atinaeina o auunaga tau fesootaiga i Samoa.



I lenei taimi o le atinaeina o le Matagaluega, e taua se sao o le auaunaga a lenei vaega mo Aiaiga Faavae, i le tuufaatasia o le Galuega faatino a le Matagaluega i fesootaiga faifaiepa ma isi kamupani ma tagata lautele ae maise foi o le Malo ma i latou uma o loo aafia i lenei auaunaga, aua se faatulagana o le matafaioi tau Fesootaiga, ae maise foi mo le faamautuina o lenei Auaunaga Faavae mo Fesootaiga.

5.2 Vaega mo Laisene ma le Mataituina o Galuega:


O le Vaega lenei e fesootai ai le galuega a le Vaega o Aiaiga Faavae ma le Pulega o Alaleo e ala i lana galuega o le asiasia ma le mataituina o faatinoga. E manaomia le maitauina lelei o faatinoga o galuega tau fesootaiga a kamupani o loo fitoi ma ia matafaioi, i tulaga o le faamalieina o manao o tagata o faaogaina ia auaunaga ia tusa ai ma aiaiga o laisene e pei ona tuuina atu i a latou kamupani, faapea foi ma le fuafuaina o le faalauteleina o ia auaunaga ia faamalieina na manaoga. O lenei Vaega e manaomia foi ona faatinoina ni suesuega ma ni fautuaga i tulaga tau inisinia ma tulaga tau tupe i nisi ituaiga fou o masini ma faiga e faaono aoga mo lenei auaunaga.

O le vaega foi lenei o loo gafa ma le faafoeina ma fautuaina faaiuga e manaomia i talosaga mo laisene e faatoai mai mo le faaogaina o alaleo, ma le asiasiina o nofoaga ua faamoemoe mo le fautuina o nei pisinisi tau fesootaiga.

5.3 Vaega mo Galuega Fesoasoani:

E aofia i lenei vaega le au tausi tusi, le auaigaluega mo faamaumauga, ma le vaega mo a’oa’oga, ma le faatinoga o isi galuega tau le ofisa mo le tuuina atu o galuega fesoasoani e manaomia mo le faaleleia atili o le auaunaga autu a isi vaega o le Matagaluega e pei ona taua muamua. O loo faauluulu i le Ofisa Sili o Pulega lenei vaega, peitai o loo iai le faamoemoe e toe siitia le tulaga o lenei tofiga i le tulaga o le Faatonu Lagolago ina ia talafeagai ma le taua o galuega faatino, aemaise foi o le faatusatusa i isi vaega o le Matagaluega.

6. Faatulagana o le Matagaluega o iai nei



7. Tala Faatatau o le Tupe

O se aofaiga e \$600,000 na vavaeeseina mai le tala faatatau mo le Tupe mo le tausaga 1999/2000 mo le Matagaluega tuai o Falemeli, na faatupe ai le faavaeina mai o le Matagaluega fou o Meli ma Fesootaiga. Na iai foi se faaopoopoga e tusa ma le \$300,000 na faaagaga mo le faavaeina ma le faafoeina o le Vaega mo le Pulega o Le Fusi o Alaleo Leitio. O le tele o lenei seleni na faaaogaina mo le faavaeina o lenei Matagaluega fou, peitai e lei tele se faaaogaina o le vaega tupe na faaagaga mo le Pulega o le Fusi o Alaleo Leitio, ona sa faatinoina pea e le aufaigaluega a le Matagaluega ia tiute i le tausaga muamua lenei.

8. Tulaga na iai le Auaunaga tau Meli ma Fesootaiga ao lei oo mai i le Tausaga 1999

Ua tuuina atu i le Kamupani a le Samoa Communications Limited le laisene mo le sefulu tausaga e na te faatinoina ai le auaunaga autu i galuega tau meli ma fesootaiga. O galuega ia sa faafoeina uma e le Matagaluega o Falemeli i tausaga ua mavae. O lea matafaioi e aofia ai le faafoeina o le auaunaga tau falemeli, o le faafoeina o tulaga uma e moomia i le faataotoga faavae o masini ma meafaigaluega aua le auaunaga tau telefoni, faapea ma le faasoaina o laina telefoni autu faapea ma lala o isi auaunaga e fesootai atu iai aua le auaunaga mo le atunuu.

O vaega o loo sosoo atu nei o loo ootooina atu ai se faamatalaga o tulaga atinae na faatinoina i le auaunaga tau meli ma fesootaiga a'o le'i faavaeina mai le Matagaluega fou o Meli ma Fesootaiga faapea ma le Kamupani o Fesootaiga a Samoa.

8.1 Galuega Atinae Tele Iona Lua i Vaega Tau Fesootaiga:

O le tele o masini autu ma vaega faavae mo le faatinoina o le auaunaga tau fesootaiga o loo iai nei, sa faatinoina i lalo o le Galuega Atinae Tele Iona Lua i Vaega Tau Fesootaiga, mai le tausaga e 1990 seia oo mai i le tausaga 1994. O lea Galuega Atinae na faatupeina mai e le Faletupe mo Atinae a Asia ma le Faletupe o le Lalolagi. O le sini autu o lenei Galuega Atinae, ina ia faaleleia atili le tulaga o fesootaiga tau telefoni, ma faia ai se faavae aua le faafoeina o nisi atinae mo lenei lava auaunaga i le lumanai.

O lenei Atinae na mafai ona faaaogaina nisi o ituaiga faiga fou faasaienisi, ua mafai ai ona maua fesootaiga silisili ona lelei e itiiti se tausiga e manaomia iai, ae tele lo latou faamoemoeina. O vaega tetele e tolu o lenei galuega faalatele ma le faaleleia, e aofia ai masini e fesootai ai ala telefoni, (Switching), o masini mo le faasalalauina o leo i le ea, (Transmission) faapea ma Uaea ma masini mo fesootaiga o telefoni (External Plant). O nisi o taunuuga o lenei Atinae e aofia ai le fausiaina o se Fale o Masini mo Fesootaiga o ala telefoni e oo atu Iona tele i le 10,000 laina telefoni ma se Vaega e fetuunai ai fesootaiga telefoni tuutuu mamao, sa suia ai masini telefoni tuai e tusa na o le 3,000 laina telefoni na mafai ona maua ai, ma ua silia i le 10 tausaga talu ona faaaogaina. E fa nisi Fale Telefoni mo Vaega o le Atunuu i tua atu o le Taulaga, sa fausiaina i afioaga o Faleasiu, (700 laina), Lufilufi, (250 laina), Salelologa, (700 laina) ma Auala, (250 laina),

ma ua faaleleia atili ai fesootaiga tau telefoni e le gata i le faateleina o laina telefoni ae faapea foi ma le anagata o ia ituaiga o fesootaiga fou mo ia afioaga ma itumalo o loo tau atu iai ia laina o fesootaiga. Ua fausiaina foi se Upega o ala leo Leitio o ituaiga fou faaneionapo, mo le faafesootaiina o nei Fale Telefoni fou ua fausia.

Ua auala foi i le Galuega Atinae ni laina o Uaea mo Fesootaiga e ala i le eleele faapea foi ma laina e tosaina i luga o pou, mo ia Fale Telefoni fou ua fausia i Apia ma nuu i tua.

O le Vaega e lua o lenei Galuega Atinae Tele mo le faaleleia o Fesootaiga, ua aofia ai se Fesoasoani tuusao mo le faaleleia ma faamalosia atili o le vaevaeina o galuega a le Matagaluega o Falemeli e pei ona iai. O lea fesoasoani na sailia ai ni fuafuaga talafeagai aua le faaleleia o faiga mo le mataituina lelei o le faaaogaina o vaega tupe. Sa faapea foi ona fuafuaina ai ma le fuafuaga tuutuu mamao mo se fesoasoani i le Malo aua le fausia o ni Tulafono ma Aiaiga talafeagai e avea ma taiala i le Atinaeina o Fesootaiga tau Meli ma Telefoni i le lumanai.

8.2 Nofoga Fou mo Fesootaiga Tau Satellite:

Na Faaulufaleina le Nofoga Fou mo Fesootaiga Tau Satellite i Maluafou i le Tausaga e 1993, lea na suiina ai le Nofoga tuai mo Fesootaiga tau Satellite i Afiamalu. O lea Galuega na mafai ai ona faateleina i le 90 laina mo fesootaiga ma atunuu mamao e ala i lea Nofoga fou mai le 46 laina na mafai ona maua i le Nofoga tuai na iai. O lenei Nofoga Fou o se Fausaga aupito sili ona lelei i onapo nei ma e tele atu lona malosi i tulaga o laina e maua ai faapea foi ma le sili atu o le manino o leo i ona ala leo mo fesootaiga.

8.3 Galuega Atinae o le IRT 2000 a Farani:

O lenei Galuega Atinae na faatupeina i se fesoasoani mai le Malo o Farani ma na faatinoina lava mo le faaleleia ma le fausiaina o ni ala telefoni e faapitoa lava mo fesootaiga aua le galuega tau le faafoeina o Vaalele Sivili (Civil Aviation) i le Malae Vaalele i Faleolo. O lenei Faiga fou mo fesootaiga ua suia ai nei le faiga tuai na faaaogaina ai se laina uaea telefoni na taoto sa’o mai le Fale telefoni i Apia e tau mai i le Malae Vaalele i Faleolo i le mamao e tusa ma le 19 maila. O lea laina na tulai mai ai le tele o faaletonu ona ua tuai ma sa faaono lamatia ai le sologa lelei ma le saogalemu o le galuega tau Femalagaiga i Vaalele.

O le tele o avanoa na mafai ona gafatia e lea Faiga fou mo fesootaiga ua mafai ai foi ona faaaauina atu le auaunaga mo ni telefoni i nisi o vaega o le Atunuu e pei o le nofoaga i Tuasivi ma itumalo tau lalata atu iai faapea foi ma le alalafaga o Mulifanua.

8.4 Galuega Atinae mo Fesootaiga tau Telefoni i nuu i Tua:

O le Malo o Iapani na faatupeina i lalo o lana Polokalame o Fesoasoani le isi foi lenei Galuega Atinae ua mafai ai ona faaleleia le tulaga tau fesootaiga i nuu i tua e faaaogaina ai ni Faiga fou o ala Leitio, lea ua mafai ona faatinoina ai ni telefoni i nisi o ia afioaga e

lei iai muamua ni telefoni faapea foi ma le faaopoopoina o laina telefoni mo nisi alalafaga o loo iai ni telefoni taitasi mo fesootaiga a tagata lautele. O itumalo ua aofia i lenei Galuega Atinae e amata mai Aleipata i le motu o Upolu seia paia le Itu Salega i Savaii.

8.5 O isi Auaunaga Taua e ala mai Fesootaiga tau Telefoni:

O nisi auaunaga e faaaogaina ai fesootaiga ala leo telefoni e ese mai galuega ua laiseneina e faatino e le Kamupani o Fesootaiga a Samoa, o loo faatinoina nei e ni kamupani tau fesootaiga ma meli faavavave (courier) tutoatasi (private companies) i totonu o le atunuu. O ia auaunaga e aofia ai fesootaiga i telefoni feaveai (mobile cellular), ma fesootaiga tau Initaneti (Internet), lea sa iai a'o lei faavaeina mai le Kamupani o Fesootaiga a Samoa. O nisi foi o nei kamupani tau fesootaiga latou te faatinoina le faatauina atu o masini ma mea faigaluega tau telefoni atoa ai ma le faapipiina o nisi o nei masini tau fesootaiga.

8.6 Telefoni Feaveai:

I le tausaga e 1995 na fautuaina ai e le Matagaluega o Falemeli le Kapeneta ina ia faatinoina loa lenei auaunaga i telefoni feaveai mo le atunuu. Na faia loa le faaiuga a le Kapeneta ina ia faatumaotiina le faafoeina o lea auaunaga. Sa faia loa tauofoga mo lea galuega ma faatuina ai loa le kamupani o le Telecom New Zealand mo le faafoeina o lenei auaunaga. O le Laisene na tuuina atu i lea kamupani e faapitoa ai le faatinoina o telefoni feaveai i le ituaiga faiga tuai o le Analogue. I le taimi nei e na o le pau lea o le ituaiga telefoni feaveai o loo faaaogaina i le atunuu. Peitai e iai isi ituaiga telefoni feaveai e faaoga ai faiga fou o loo fuafuaina mo le faaleleia atili o nei ituaiga o fesootaiga i telefoni feaveai. E iai le lagona o le faia o lenei auaunaga i le tulaga faatauva e pei foi ona faia i isi matafai o le a siitia ai le tulaga anagata o ituaiga telefoni e faaaogaina ma e faaono taugofie ai foi le faaaogaina o nei ituaiga telefoni e le atunuu.

8.7 O le Auaunaga i le Initaneti:

O le Auaunaga i le Initaneti (Internet), na mua'i faatinoina i le atunuu e se kamupani na faaigoaina o le Pacific Internet Company. I le tausaga e 1997 na faaletonu ai lea kamupani ma motusia ai loa lea auaunaga. Na pasia loa e le Malo le Tulafono o le Initaneti 1997, ma faatagaina ai loa le Matagaluega o Falemeli na te faamaopoopoina le toe faafoeina o lenei auaunaga mo le atunuu. Ua talafeagai lea fuafuaga a le Malo aua ua mautinoa ai le toe faaauauina i se taimi vave o lenei auaunaga o le Initaneti ma ia mautinoa ai foi le faatinoina i se tulaga faaleleia o lenei auaunaga e pei ona ua tulai mai ai nei.

O le tausaga e 1998 na tuuina mai ai e ni kamupani se lua ni ofo mo le faatinoina o lenei auaunaga. Ma ina ua maea ona iloilo ina i ona itu taua uma, o lea na tofia ai loa le kamupani a le Computer Services Limited na te tauaveina le faatinoina o lea auaunaga tau internet (Internet Service Provider) mo lea foi taimi. Ao le Matagaluega o Falemeli na faaauauina pea lana tautua e avea ma Faitotoa Autu (Main Gateway) mo fesootaiga mai i totonu ma le alu atu i atunuu i fafo o lenei auaunaga tau Initaneti. O le isi kamupani

na tuuina mai sa latou fuafuaga mo le faatinoina foi o lenei matafaioi, le kamupani lea a Lesa Telephone Services, na tuuina iai le laisene e avea ai ma kamupani lona lua e faatinoina le Initaneti mo le atunuu i le taufaaiuga o le tausaga lava e 1998. I le amataga o le tausaga e 2000 na toe tofia ai le isi kamupani, le Ipasifika, ma e ua tolu ai nei kamupani o loo faatinoina lea auaunaga tau initaneti mo le atunuu.

Ua tuuina atu i le kamupani a le Samoa Communications Limited le laisene e mafai ai ona faatinoina faapitoa auaunaga uma tau fesootaiga mo le atunuu. O lea malosiaga ua mafai ai foi pe a talafeagai ona faatinoina e lea lava kamupani lenei auaunaga tau Initaneti. Peitai ona o lea foi kamupani ua latou faafoeina nei ma vaia le Faitotoa Autu Faavaomalo (Main International Gateway Provider), o lea e faaono faigata ai ona ia avea foi ma se tasi o kamupani e faatauva i lea galuega o le initaneti.


Ua faatauaina ma faaaogaina tele lenei auaunaga o le initaneti, i totonu o le atunuu, ma o lona tusaafia e mafai ona fuaina i le tele o kamupani ma pisinisi faapea ma auaunaga a le Malo e iai le Soifua Maloloina, Aoga, Ofisa o Faalapotopotoga faa-le-va-o-Malo, faapea foi ma nisi o le mamalu o le atunuu, ua latou faaaogaina nei lenei auaunaga. Pau le faafitauli ua maitauina i lenei vaitaimi o le utiuti lea o laina telefoni e faatinoina ai lenei auaunaga mo tagata lautele o le atunuu, aemaise i nuu i tua ma afioaga e faigata ona tosoina iai ia laina telefoni.

8.8 Isi Auaunaga e Tatau ona Faatinoina i Totonu o le Atunuu:

E tele nisi auaunaga e faaaogaina ai fesootaiga tau telefoni, o loo ua faaaogaina nei i le tele o atunuu o le lalolagi e faaono mafai ona faatinoina nei i le auaunaga tau fesootaiga i le atunuu. O le Fetufa'iina o Faamatalaga ma Faamaumauga Tetele e ala i masini komepiuta, (Packet Switching), o Masini Faailo e Logoina ai se Fesootaiga faanatinati (Paging), o Fesootaiga tuusa'o e le Faalavelaveina e faaaogaina ai ala leitio, (Wireless Local Loop), o ituaiga uaea telefoni e fausia i le Uaea Faipa (Fibre Optic cables), o Fonotaga e faaaogaina ai Fesootaiga i Ata Gaoioi ma Leo (Teleconferencing), o Fesootaiga mo Galuega tau Togafitiga o Ma'i e faaaogaina ai Ata Gaoioi ma le Leo (Telemedicine) faapea foi ma le Metotia fou e mafai ai ona maua i se Masini se tasi le tele o nei Auaunaga eseese e pei ona faamatalaina i luga (Convergence Technology). Ua na o ni nai metotia fou ia e faaaogaina ai fesootaiga tau telefoni, ua loa ona faaaogaina i le tele o atunuu e maualuga lo latou atinae i le lalolagi. O nisi atunuu e le maualuga lo latou atinae i le Pasefika e pei o Fiti, Papua Niukini ma Tahiti ua amata ona latou faaaogaina ia ituaiga metotia fou.

8.9 O le Atinae o le Auaunaga tau Meli:

O se tasi o vaega taua o galuega Atinae i tausaga e pei ona faatalanoaina i luga, o ni fuafuaga ia mo le faalauteleina o galuega tau meli i vaega i nuu ma itumalo i tua, atoa ma le faafouina o metotia ma auala mo faatinoga o le auaunaga tau meli. E aofia i ia fuafuaga le fausia o nisi Falemeli Faaitumalo ma nisi foi Falemeli laiti i isi nuu. O le taimi muamua foi lea i le tala faasolopito o le Auaunaga tau Meli i Samoa ua faaaogaina ai masini komepiuta mo le faatinoga o galuega a le Faletupe a le Falemeli na iai i lea taimi. O nisi o auaunaga fou mo le faatinoga o Meli na faavaeina i ia lava polokalame



mo atinae i auaunaga tau Meli i le atunuu. O le faalauiloaina o le auaunaga fou ua taua o le Meli Momoli Sa'o, ua iloga lona taua i le taumafaiga a le Matagaluega mo se tulaga o se auaunaga faatauva ma kamupani tutoatasi o loo faatinoina le auaunaga o le feaveaiina lea o meli ma afifi i se tulaga faavavave. (Private Courier Services). Na faapea foi ona faaaogaina ai i ia fuafuaga masini fai faailoga tusi, (Franking Machines), ma ua maitauina ai le faatinoina i se taimi vave ni faailoga tusi e lolomiina e ia masini ma ua avea ai o se isi faiga e faatinoina ai faailoga tusi e ese mai le faaaogaina o faailoga tusi e pei ona masani mai ai mo le lafoina o tusi. O lea faiga ua faafaigofieina ai ma ua faaaogaina tele e kamupani ma Faalapotopotoga tetele faapea foi ma Galuega a le Malo o loo tele a latou meli e manaomia e lafoina aua le faatinoga o a latou galuega.

E tele foi nisi o suiga na faia i le faataotoga o le vaega o le Fale o loo faatinoina ai galuega tau Meli ua mafai ai ona faatinoina i se tulaga faaleleia ma le faafaigofie le auaunaga tau meli mo tagata lautele. Na toe faatulagaina foi le Vaega e vaaia le gaosia o Faailoga Tusi (Philatelic Bureau) i le Fogafale i lalo ma le toe faataotoga o vaega e faatinoina ai meli ma afifi ina ia faaleleia atili le auaunaga tau meli faapea foi ma lona puipuiga.

E ui lava ina sa toe faaletonu le auaunaga ona o le faaleagaina o nisi o vaega o le Falemeli e afa o Valelia ma Ofa, peitai na mafai lava e le Matagaluega ona faaauauina lana polokalame o le galuega faa Faufautua (Consultancies) e ala i se fesoasoani mai o le Faalapotopotoga Tau Meli a le Lalolagi (Universal Postal Union) mo le faailoaina o faiga ma metotia faaonaponei, faapea foi ma le aoaoina o le afaigaluega a le Matagaluega. O le faalauteleina o ia auaunaga na alagata ai le aoaoina o le afaigaluega ma le tuuina atu o ni masini fou mo ia auaunaga i vaega o itumalo ma nuu i tua.

O le tausaga e 1995 na faatauina ai le Faletupe a le Falemeli (Post Office Savings Bank) ina ia tusa ai ma Fuafuaga Faataatitia mo le Faaleleia Atili o Galuega a le Malo.

8.10 Afa o Ofa ma Valelia:

E iai le taofi e tatau lava ona faia se faamatalaga ootoo i le aafiaga o le galuega atinae i Meli ma Fesootaiga a le atunuu, i nei lava afa. O le masina o Fepuari na taia ai le atunuu i le afa malosi o Ofa. E ui ina sa faatalia ma le naunautaiga maualuga se tulaga faaleleia o galuega tau atinae a le Matagaluega i lea tausaga, aemaise i atinae e pei ona faamatalaina i luga, ae na matua faaleagaina ma faatamaia le tele o masini ma mea totino na iai e faatino ai galuega a le Matagaluega. O le toe tolopoina o le faatinoga o galuega atinae na fuafuaina mo lea lava tausaga, o lona uiga o le mautinoa foi lea ma le lagona faanoanoa o le toe faatuai o fuafuaga mo le lumanai a le Matagaluega.

O le faaleagaina o meafaigaluega aua le auaunaga a le Matagaluega, e le afa o Ofa na matua ogaoga ma lautele, aemaise lava i le vaega o Fesootaiga lea na tusa ma le 80% o meafaigaluega e aofia ai uaea mo laina i fafo, masini mo fesootaiga tau leitio, ma masini mo le fesootaiina o laina telefoni, na matua faaleagaina ma sa faapea ona leai se auaunaga i ia vaega mo le tele o masina i se vaega tele o le atunuu.

Na matua faaleagaina foi le Falemeli autu i Apia faatasi ai ma isi Falemeli ma nofoaga a le Matagaluega i Salelologa, Asau, Tuasivi, Maluafou, Tapuivi, Lepiu-tai, Afiamalu, ma Mauga Fiamoe, ma sa manaomia ai foi ni galuega tele mo lo latou toe faaleleia vave.

E peiseai e lei lava le galuega lepeti na faia e Ofa, aua o le tausaga e 1991 na toe molimauina ai foi se tasi mala faa le natura i le afa o Valelia. Aua e ui ina sa matua tele le faagasologa o galuega mo le toe faaleleia o mea na faaleagaina e le afa o Ofa, na toe faapoopoina ma faateleina mea na faatamaia e Valelia. O le itu tau Fesootaiga i Telefoni na sili ona faaleagaina ma na avea ma toatuga o le Matagaluega i lea lava tausaga. Pe tusa ma le 60% o le vaega o laina mo telefoni na matua faaleagaina. Peitai o le tulaga faaitiitia o vaega na faaleagaina o ia laina e Valelia pe a faatusatusa ia Ofa, na mafua ona o le tulaga anagata o ituaiga o uaea telefoni ma metotia fou na faatoa maea ona faapipiina i lalo o le galuega Tele o le Atinae o Fesootaiga lea sa faagasolo i lea vaitaimi. O nisi o fale na faatamaia e Ofa o loo tau faaleleia pe lei toe faaleleia lava i le taimi o Valelia.

E sili atu i le lima miliona tala le tau na fuafuaina mo le toe faaleleia ma le fausiaina o mea na faaleagaina e afa o Ofa ma Valelia.

9. O le Galuega a le Matagaluega i le Uluai Tausaga o lana Auaunaga.

9.1 O le Aiaiga Faavae Mo le Vaega o Fesootaiga:

O se tasi o Matafaioi tele na feagai ma le Matagaluega ina ua faatoa faavaeina mai o le fausia lea ma tusitusia se Aiaiga Faavae mo le Vaega o Fesootaiga a le atunuu. Na tofiaina e le Kapeneta se Komiti Galue mai nisi o i latou e aafia i le faatinoga ma lenei auaunaga i le Vaega o Fesootaiga, latou te suesueina ma faatalanoaina ma fausia se tusitusiga faataitai muamua o le Aiaiga Faavae. O ia sui auai na aafia ai sui mai kamupani eseese i galuega tau telefoni ma meli feaveai i totonu o le atunuu, o sui mai Matagaluega ma Faalapotopotoga tumaoti a le Malo, o le Faalapotopotoga o le Au Faipisinisi, faapea ma sui mai le atunuu lautele. O le Matagaluega o Meli ma Fesootaiga na faatonuina na te tuufaatasia le galuega a lenei Komiti. Na mafai ona tuufaatasia ma tuuina atu i le Kapeneta mo sana iloiloga ma sana faaiuga e tauala atu i le Minisita o Meli ma Fesootaiga le Tusitusiga Faataitai Muamua o lea Aiaiga Faavae.

E tusa ai ma le faatatau aototele a le Malo, o lea Aiaiga Faavae ua fuafuaina e faavaeina i le manatu e uunaina se faiga faapaaga lelei ma le mausali i le va o le Malo ma Kamupani pulea saoloto. E faamamafaina i lea fuafuaga le moomia o le tatalaina o faiga faatauva talafeagai i le auaunaga tau meli ma fesootaiga, e avea o se faiga faavae e ausia ai le sini autu ma le faamoemoe i le faaleleia atili o le tulaga o ia auaunaga mo tagatanuu o Samoa. E mafai ai foi i lea lava taimi ona faalauiloaina se siomaga lelei mo fefaatauaiga mo tagata uma e aafia ai i ia lava auaunaga. O se faauigaina o le tulaga anagata e faavaeina i le mauagofie o ia auaunaga mo tagata uma o le atunuu ma ia faamautinoa le faaaogaina o metotia fou e sili atu lo latou lelei ma e gafatia e tagata

lautele o latou tau. O ni sini autu mo ia auaunaga le faamautinoaina o le gafataulimaina lelei ma le talafeagai o ia lava auaunaga ma ia avanoa mo tagata lautele uma o le atunuu.

9.2 Galuega mo Laisene ma le Mataituina o Galuega:

E iai ni faafitauli e masani lava i ni galuega tau amata na feagai ma le Matagaluega i lenei tausaga muamua o lana auaunaga. O nisi o ia faafitauli ua faamalosi ai le fautuaina o ni nai suiga ma teuteuga o tulafono faavae o iai nei mo galuega tau fesootaiga. E iai le talitonuga ua alagataua ona fetuunaiina tulafono uma o iai nei tau fesootaiga ina ia soloia atoa le Tulafono o Falemeli 1972, ae faatumauina le Tulafono o Galuega Tau Meli ma Fesootaiga 1999, e mautinoa ai le manino lelei ma foia ai uiga lasi ma le feteenai. I se faatalanoaaga susesue na faia o se vaega o le galuega mo le fuafuaina o le Aiaiga Faavae mo Mataupu tau Fesootaiga, na aliali mai ai se vaeluaina o finagalo o sui aafia mo lea komiti, i le fesili poo ai le pulega e tataua ona faafoeina le faatinoina o Tulafono ma Laisene o loo aiaia ai fesootaiga. Fai nisi e tataua ona faafoeina e se Pulega tutoatasi e le aiaina e le Malo, ae o isi o loo manatu o se vaega taua tele lea mo le Malo e tauala i le Matafaioi a le Matagaluega o Meli ma Fesootaiga. O le avea o le matata o le faatinoina o meli ma telefoni ma faatinoga faa-pisinisi, aemaise i le va ma isi kamupani tau fesootaiga tutoatasi, ua manaomia ai le Malo ina ia faia ma le tulaga tutusa ma le talafeagai le faafoeina o le vaega tau tulafono mo le pulega o Fesootaiga i le atunuu. O le faavaeina mai o le Matagaluega o Meli ma Fesootaiga e pei ona iai nei, ua tulaga talafeagai ai nei i le Malo ona faamaite ma faavaeina se faatinoga lelei o ia pulega mo lona atinaega aua le lumanai.

O nisi o vaega ogaoga na iloiloaina o lenei lava mataupu e aafia ai le tulaga taugata tele o le toe faavaeina ma faatuina o se isi foi Pulega mo le faafoeina o nei tulafono. O le Matagaluega o Meli ma Fesootaiga e pei ona iai nei, ua faatonuina e le Malo faale-tulafono e fautuaina le Minisita o Meli ma Fesootaiga, i mataupu uma e aafia i le faatinoga o laisene, ma e aafia ai foi le asiasiina ma fuafuaina faale-tulafono o ia lava galuega. I le ma le isi, o le amatalia o le faafoeina o galuega tau fesootaiga i tulaga faapisinisi e tusa ai ma le faamoemoe o le Faamatalaga o Fuafuaga tau le Tamaoaiga a le Malo mo le 1999/2000, o se faiga ua faataitaiina ai e le Malo lona naunautaga mo le galulue vavalalata ma le Vaega Fai-Pisinisi. O lea aafiaga o le vaega fai-pisinisi e mafai ai foi ona faalaulelei le avanoa mo le faatinoga o pisinisi i faiga faa-faatauvaga e faaleleia atili ai le auaunaga tau fesootaiga i le tulaga anagata ma le taugofie o ia auaunaga mo tagata i le lumanai. O le tatalaina o lea faiga faa-tauva e mafai ai foi ona faateleina le aafiaga faa-pisinisi taitoatasi i ia lava auaunaga. O sea tulaga o le a avea ma valaau mo se pulega le-faaituau ma talafeagai mo le faafoeina o Tulafono ma Laisene i le Vaega tau Fesootaiga.

9.3 Pulega o le Fusi o Alaleo Tau Fesootaiga:

O le pulega o le fusi o alaleo tau fesootaiga o le faatinoina lea o ni aia tataua a soo se atunuu o le lalolagi, i se vaega o lea fusi o alaleo, ua maea ona faamatuina mai e le Faalapotopotoga o Fesootaiga a le Lalolagi, mo le faatinoina o fesootaiga tau telefoni ma uaealesi. Ona o lea la, o tulafono faava o malo faatasi ma tulafono a Malo lava ia e

faaaogaina e pulea ai le faasoaina ma le faaaogaina o ia alaleo. O lea la matafaioi na faatinoina mai lava e le Matagaluega o Meli ma Fesootaiga talu mai le pasia o le Tulafono o Falemeli i le tausaga e 1972, seia oo mai ina ua faamutaina lea Matagaluega ia Iulai 1999. Na amata mai i lea lava taimi ona tauaveina ia galuega e manaomia mo le faasoaina ma le tausia lelei o lea Fusi o alaleo. O lea faatinoga o loo faatonuina i le tulafono ua faavaeina ai lea Matagaluega o loo aiaia ai se tasi o ana matafaioi ina ia tauaveina galuega talafeagai ma manaomia mo le faatinoina lelei ma talafeagai o ia Tulafono.

O lea galuega o loo faatinoina nei e le Matagaluega o Meli ma Fesootaiga, lea o loo iai se aufaigaluega itiiti e iai le tomai e faatinoina galuega faavae e pei o le faasoaina o alaleo ma le pulega o le Faasoaina o le Fusi o Alaleo. Ua maea ona tuuina atu i le ITU se talosaga mo se fesoasoani faavaitaimi puupuu mo le faamautuina o tulaga tau faamaumauga ma le faaleleia atili o metotia ma polokalame mo se faaleleiga o le Pulega o le Fusi o Alaleo, ma faatinoina ai foi ni aoaoga mo le aufaigaluega a lea Pulega.

O le Fusi o Alaleo o se aia tumaoti lea a soo se atunuu, ma e tatau lava i soo se Malo ona avea ma ana anava tauave i lona puleaina ma lona puipuiga lelei. E taga faatusatusa lenei galuega i isi foi pulega i mataupu tau laisene, o loo faatinoina e isi Matagaluega ma Faalapotopotoga a le Malo. E ui la ina e foliga o se galuega masani ma faifaipea lenei vaega, ae o se vaega taua tele ma e iai lona aoga fesootai, mo le lelei o le faatinoga o le galuega faufautua i tulaga tau Laisene, a lenei Matagaluega.

Ua avea nei ma faamuamua sili le manaomia tele o le pulea lelei o le Fusi o Alaleo ma faatuina se faasologa lelei ma le talafeagai mo le faatatau o le faaaogaina o ia alaleo, ona o le faatupulaia pea o le manaomia o masini ma faiga fou e faaaogaina ai ia alaleo mo le initaneti ma isi fesootaiga e faaoga ai uaealesi.

9.4 Tagata Faigaluega ma Aoaoga:

O le naunautaiga e faaleleia le tulaga anagata o le auaunaga, ua faatinoina ai nisi suiga i le tulaga o masini ma metotia foi faaneionapo, ma ua mautinoa ai le tulaga faafouina ma faatinoga o ia metotia foi i lenei auaunaga. O lea la ua tulai mai ai ni suiga fou taua i le matafaioi Autu a le Matagaluega, mai faiga ma faatinoga masani ao iai faatasi pea i le Falemeli Tuai. O le faamuamua ua tuuina nei e le Matagaluega mo le faaleleia o Tulafono Faatonutonu ma Aiaiga Autu mo le faatinoga o le matafaioi lautele tau fesootaiga ua atagia ai le faamamafa ua atofaina nei mo manaoga tau le aoaoina lelei ma le faaleleia o tomai ma agavaa o le aufaigaluega. Ua faateleina le eseese ma le tulaga faapitoa ua iai i galuega a le Matagaluega, ma ua manaomia ai lava le toe faaleleia o agavaa ma le tulaga o le aoaoina lelei o le aufaigaluega mo ia matafaioi eseese. Ona o lea tulaga ua toetoe ai o avanoa talafeagai uma lava tau aoaoga e maua, ua faaaogaina e le Matagaluega. Peitai o le leai o ni fesoasoani tau tupe mo nisi o nei avanoa mo aoaoga ua avea pea lea ma toatuga i lenei taumafaiga.

O Aoaoga o se fesoasoani taua tele lea mo le Matagaluega e le gata mo le faaleleia atili o le tomai ma agavaa o lana lava aufaigaluega, aemaise foi o lana matafaioi e fautuaina ai

ni polokalame tau aoaoga mo le faaleleia atili o tomai ma agavaa o le aufaigaluega i le Vaega o auunaga tau Fesootaiga lautele, ina ia mautinoa ai le ausia pea o tulaga anagata ma le lelei silisili mo ia auunaga mo le atunuu. O le faatuina o le Vaega tau Aoaoga mo le Matagaluega o se fuafuaga ua tataua ona faataua ma ave iai le faamuamua, ona o le tulaga moomia tele mo le faaleleia o le agavaa ma tomai faapitoa mo atinae e le gata mo lana lava aufaigaluega ae faapea foi mo le auunaga lautele tau Fesootaiga. O se Faasologa o Mafutaga faa le Aoaoga ma Faatalanoaga i mataupu tau le Faailoaina ma Aiaiga Autu i ia auunaga, o le a avea ma vaega taua o le Polokalame o Aoaoga a le Matagaluega i le isi tolu tausaga o lumanai.

O loo faaauuina pea aoaoga a’o faatinoina galuega mo le faaleleia atili o tomai o le aufaigaluega i nisi mataupu e iai faamaumauga o faamatalaga, va-fealoaloi ma tagata lautele, vaaiga o le aufaigaluega ma le faaleleia o le malamalama i tulafono faatonutonu ma aiaiga a le Ofisa o Tupe ma le Komisi o Galuega a le Malo.

Aoaoga ma Fonotaga na Auai ai le Aufaigaluega:

	Suafa o Sui Auai	Fonotaga	Aoaoga	Periota	Valaau Faapitoa	Nofoaga
1	Hon Gafa Ioelu } Sapau R Petaia }	Fono lona 22 Iuni o Mataupu Fesootaiga tau Meli a le lalolagi		23/08-15/09/1999	UPU	Beijing Hong Kong
2	Sapau R Petaia	PITA		04-06/10/1999	PITA	Nadi, Fiti
3	Sapau R Petaia	Mataupu Fesootaiga i Ata ma leo ma le Malo Amerika Samoa.		15/12/1999	Amerika Samoa	Amerika Samoa
4	Sooialo D Fong	Fonotaga faaletausaga lona lua, ITU		03-07/4/2000	ITU	Sineva, Suitiselani
5	Faafetai Ah Kuoi	Fonotaga faaletausaga lona 4, PITA.		03-05/5/2000	PITA	Nadi, Fiti
6	Leuelu Setu		Alaleo mo Fesootaiga i Leitio	03-07/4/2000	ITU	Islamabad Pakisitani
7	Sooialo D Fong	Mataupu Atinae Fesootaiga Leitio i le Lalolagi		7-8/6/2000	ITU	Atlanta, Georgia
8	Kisa Kupa	Fonotaga lona 2, Vaega Suesue		19-23/6/2000	APT	Seoul, Korea

UPU: Faalapotopotoga o Meli i le Lalolagi; **ITU:** Faalapotopotoga o Fesootaiga i le Lalolagi;
APT – Faalapotopotoga o Fesootaiga i Asia ma le Pasefika

9.5 Fuafuaga mo le Faafoega ma isi Lomiga:

Ua maea nei ona faatinoina le lomiga faataitai o le Fuafuaga mo le Faafoega a le Matagaluega. O lea Fuafuaga faataitai ua fautuaina ai se faatinoga o matafaioi a le Matagaluega i le isi tolu tausaga o lumanai mai ia Iulai 2000 seia oo atu ia Iuni 2003.

O isi lomiga o loo tuufaatasia nei e aofia ai se Fuafuaga mo le Pulega ma se Taiala mo Faatinoga, mo le Matagaluega. O nisi foi faaiuga o Suesuega ma Faamatalaga a le Matagaluega o le a faailoaina i tulaga e talafeagai ai i nisi o Lomiga o faamaumauga ma fuainumera a isi Matagaluega a le Malo mo le silafia e le atunuu lautele.

10. Vaaiga Lautele i le Galuega a le Matagaluega ma se Fuafuaga mo lona Lumanai

10.1 Matafaioi ma Tulafono:

O loo iai pea ni faafitauli i le faatinoga lelei o le auunaga a le Matagaluega ona o le lava o aiaiga faatonutonu mo pulega i le tulafono, i le tulaga tonu ma le manino o lona sao i le faatinoga o ia matafaioi. O se faafitauli autu o le tulaga faauigalua ma le faanenefu i faaupuga ma faauigana o nisi vaega o le Tulafono Autu o Auunaga Tau Meli ma Fesootaiga 1999, ae maise lava i le faatinoga o tulaga tau Laisene, ma Tulafono Faatonutonu ma le tulaga faa Faufautua mo ia faatinoga. O lea la o loo saunia ai e le Matagaluega ni fautuaga mo le toe faamaninoina atili o le Tulafono i luga o ia vaega.

O loo faatinoina nei foi ni suiga ma ni toe teuteuga mo Tulafono Faatonutonu o loo iai nei lea na faia i lalo o aiaiga o le Tulafono o Falemeli 1972 sa iai muamua, ina ia mautinoa se tulaga feoeoeai ma le talafeagai ma aiaiga o le Tulafono Autu Fou o Auunaga Tau Meli ma Fesootaiga 1999, faapea foi ma le Fuafuaga Autu mo Auunaga tau Fesootaiga o loo tapenaina ma tuufaatasia nei.

Ua alagataua ona faamaninoina Matafaioi a le Matagaluega e ala i ni teuteuga o le Tulafono, ina ia mafai ai ona faaleleia atili le faatinoga o nei matafaioi. E tataua lava ona faatagaina le Matagaluega e faatinoina ma ioeina ni faaiuga tau lana matafaioi e aunoa ma se toe faaluafesasiina ona o le tulaga le manino o iai le aiaia o ia lava matafaioi. Ua maitauina le tulaga maoae o faamanuiaga i vaega tau le tamaoiga ma le olaga lautele i le lalolagi, ua afua mai ona o le tulaga atinaeina lelei ma le faafoeina tataua o ia auunaga tau fesootaiga. O le mauagofie o le auunaga tau meli ma telefoni e tagata uma i soo se vaega o le atunuu o se fesootaiga taua lea e fesoasoani i le faafoia o le tele o faafitauli tau le tamaoiga ma le olaga lautele mo Samoa lava ia. O loo iai foi nisi fausaga fou o masini ma faiga mo fesootaiga o loo iai le naunautaiga ma o loo ua faaogaina foi e nisi o le atunuu. E tataua ona tulimataia pea ia faatatauga mo ni faatinoga e faaono manuia mo i latou o loo faatinoina ia auunaga, lea e aofia ai ma le Malo.

O sea tulaga faamanuiaina o le a mafai ona mautinoa i se fuafuaga faavaeina lelei o Tulafono Faatonutonu ma Fuafuaga mo Laisene. E tataua ona amataina lea fuafuaga i se

toe teuteuga o le Tulafono ma le faavaeina o ni tulafono faatonutonu fou ina ia mautinoa se faavae faaletulafono talafeagai e mafai ai ma e tatau ona faalagolago iai le faafoeina o le atinaega faifaipea o ia auaunaga. Ua tuuina foi le faamuamua a le Matagaluega i lea vaega o lana auaunaga i le tolu tausaga o lumanai.

10.2 Pulega o le Fusi o Alaleo ma le Matafaioi o Tulafono Faatonutonu:

E tatau ona atinaeina le Pulega o le Fusi o Alaleo i se tulaga e aofia uma ai faatinoga manaomia e iai galuega uma lava e talafeagai mo le faaaogaina tatau ma le pulega lelei o lea auala o le tamaoaiga. I lea itu e matua taua ai lava se Fuafuaga mo le Mataituina ma ina ia mautinoa le faaaogaina lelei ma le talafeagai o le Fusi o Alaleo e i latou o loo latou faaaogaina. E faapea foi i le faatinoga o tulafono faatonutonu ona opogiina le faanaunaga mo se tulafono e lelei ma aoga e faatonu ma pulea ai faatinoga o le auaunaga tau meli ma fesootaiga i le atunuu.

E eseese lava faatatauga o ia pulega o loo faia mai lea atunuu i lea atunuu o le lalolagi. O atunuu e maualuga ma mautu o latou atinae, ua alualu pea i luma le atinaeina o a latou tulafono faatonutonu mo Fesootaiga. I Niusila ua atoatoa nei le tuusaolotoga o le auaunaga tau fesootaiga i telefoni mai noanoataga o tulafono faatonutonu. O Ausetalia ma Amerika ua iai lava Pulega Faalemalo faapitoa e gafa ma ia matata, e pei o le ACA i Ausetalia ma le FCC i Amerika. Peitai i Iapani, o se tasi o atunuu malosi i ia lava atinae o Fesootaiga, o loo tumau pea le pulega o tulafono faatonutonuina o nei matafaioi i le Matagaluega o Meli ma Fesootaiga. I o tatou tuaoi i le Pasefika, o loo fefulisaia pea le fesili i ona itu talafeagai ma itu e le tatau ai, ae maise i le maitauina o le utiuti o le maketi, ma ona o le taugata o suiga ma faiga fou faaneionapo e taua ai le matua iloilo totoa o itu taua uma e aafia i lenei mataupu.

Mo Samoa lava ia e iai ni ata faataitai e mafai ona tagai iai mo le atinaeina o lenei vaega i le lumanai:

1. Tuufaatasia pea le vaega o Aiaiga Autu, o Tulafono Faatonutonu ma le Pulega o le Fusi o Alaleo Leitio i lalo o le Faamalu o le Matagaluega o Meli ma Fesootaiga.
2. Tuufaatasia le Vaega o Tulafono Faatonutonu ma le Vaega o Pulega o le Fusi o Alaleo Leitio i lalo o se Pulega e tutoatasi ma ese mai le Matagaluega o Meli ma Fesootaiga.
3. Tumau le Vaega o Tulafono Faatonutonu ma le Vaega o Aiaiga Autu i le vaauga a le Matagaluega ae faatuina se Pulega tumaoti mo le Vaega o le Fusi o Alaleo Leitio, e pei ona foliga o loo tulai mai ai nei.
4. O le isi ata faataitai o le faatuina lea o ni Pulega tumaoti se tolu mo ia Vaega eseese o le Matagaluega o Meli ma Fesootaiga, o le Vaega o Tulafono Faatonutonu ma le Pulega o le Fusi o Alaleo.

E aupito taugofie le ata faataitai muamua. O le ata faataitai lona lua e foliga o loo faatauaina ai le tulaga taugofie, ae atagia ai foi le naunautai ina ia maua le tulaga tutoatasi i le pulega ma le faatinoga o ia matafaioi. O ata faataitai lona tolu e faaono taugofie sona faatupega, ma e iai le avanoa e faatinoina ai e le Matagaluega e tasi, i tulaga feoeoeai ma le galulue fesootai e pei ona moomia tele i faatinoga o nei matata e lua o le Tulafono Faatonutonu ma le Vaega o Aiaiga Autu. O lea foi ata faataitai e maua ai le tulaga fetalai ma e mafai ona avea ma Fuafuaga e saunia ai mo nisi suiga aua le atinaeina lelei o nei matata i le lumanai.

10.3 O le Faateleina o le Upega o Fesootaiga ma Galuega Fou ma Faamaumauga o Faamatalaga o nei Faiga Fou:

Ua amatalia e le Matagaluega le faatinoga o le faamaopopoina ma faatatauina se Tuufaatasiga e ala i masini komepiuta o ni Faamatalaga Faavae e mafai ona fuafuaina ai le faatinoina o ni Faiga Fou ma masini fou faaneionapo i le auaunaga tau meli ma fesootaiga ae maise foi mo le toe faateleina ma faaleleia atili o le Upega o Fesootaiga o loo iai nei. O lea galuega e aofia ai le mataituina o gasologa o faatinoga, o le faatinoina o suesuega ma faamaumauga faatasi ai ma le maitauina lelei o faiga fou ma atinae i isi atunuu i tulaga tau meli ma fesootaiga.

10.4 Aufaigaluega:

Ona o le faatauaina o matata ma le faalateleina o matafaioi ua feagai nei ma le Matagaluega fou o Meli ma Fesootaiga, o le ala lea o le manaomia o ni agavaa ma ni tomai faapitoa mo faatinoga o ia lava galuega. O tomai faapitoa e iai inisia i mataupu tau telefoni, ma leitio o loo moomia tele i le aufaigaluega o iai nei. O ia tomai faapitoa i mataupu tau fesootaiga o loo manaomia tele ma e matua taua ina ia mautinoa le mae'ae'a lelei ma atoatoa saililiga ma faatatau a toa ai ma ni fautuaga e tuuina mai mo le fausiaina o Aiaiga ma tulafono faatonutonu, ae faapea foi ma le tuuina atu o laisene i auaunaga tau fesootaiga e pei ona manaomia ai.

E le gata i lea, o le manaomia o se aufaigaluega e iai le poto masani ma le agavaa i le faatatauina ma le suesueina o ia lava mataupu, ua matua taua tele i leni vaiata o le alualu pea i luma o le tulaga anagata ma le lelei o faiga ma metotia tau fesootaiga. O le esesega tele foi o manaoga o tagata lautele e afua mai ia i latou e manaomia lava na o se telefoni i le fale ma se tulaga faatuatua i le felauaiga o a latou meli, e oo lava ia i latou e naunautai mo faiga fou e iai le faatinoga o fetusiaiga ma fonotaga e faaogaina ai metotia fou i le komipiuta, ae maise foi o se auuala fou ua maua nei i nisi atunuu e tuufaatasia ma maua uma ai lava nei auaunaga i se masini se tasi, ua manaomia tele ai lava se isi fuafuaga ma se faatatau fou ae maise foi o se uiga fou e faatinoina e le aufaigaluega, i le fausiaina ma le faauigaina o nei lava Aiaiga faavae mo fesootaiga.

O loo faamamafaina tele i leni ripoti le tulaga moomia mo nisi tagata faigaluega e iai tomai faapitoa mo le faafoeina o galuega lagolago i totonu o le ofisa.

10.5 O le faiga Faatauavaga o se Metotia e Mautinoa ai le Anagata o le Auaunaga ma le Faatuatuaina o i Latou ua Faafoeina nei Auaunaga:

O le iai o kamupani e tolu o loo latou faafoeina le auaunaga tau initaneti, ua maua e tagata lautele le avanoa e filifili ai i se kamupani e faaaogaina. E le gata i lea ae o le mafai ona maua o le tele o ituaiga fou ma le anagata o masini tau fesootaiga e pei o PABX's, masini tali telefoni, masini leitio, ma ituaiga telefoni fou, ua avea ma sao taua i le tau faatonutonuina o tau o nei masini. O le malu puipuia o le pulega ma le maitauina lelei o le faagasologa o le faamatuuina atu o laisene ma alaleo e le Matagaluega ua faamalosi au ai foi i kamupani aua le saunia o ituaiga masini ma faiga anagata mo fesootaiga.

Ua loa ona faatinoina e nisi o kamupani e fela'uaia tusi ma afifi lea matata i totonu o le atunuu. O ia kamupani o ni faalapotopotoga faa-va-o-malo, ma e ui ina o loo faapitoaugafa la latou auaunaga i le vaega o pisinisi ma nisi vaega o matagaluega a le Malo ma le atunuu, o loo maitauina pea le tulaga lelei ma le faamoemoeina o lea auaunaga mo le mamalu o le atunuu ae maise foi o le tulaga lelei faatauva o loo galulue faatasi ai ia kamupani ma le kamupani a le SCL i le faafoeina o meli mo le atunuu.

E tatau lava ona faamalosi faiga faa-tauvaga i leni auaunaga tau fesootaiga i tulaga e talafeagai ai. O le a fesoasoani tele lea faiga i le faamautinoaina o le atinae o ia lava auaunaga e ala i le faalateleina o le upega o fesootaiga, male taugofie ma le faatuatuaina o ia lava auaunaga. O le tulaga faa-tauva e mafai foi ona fanau mai ai ni faiga fou ma le anagata tau fesootaiga, ma ni lagona loloto faataiala.

10.6 O Laisene ma isi Totogi:

O laisene ma isi tau o galuega tau fesootaiga na fuafuaina ma pasia tusa ma le 10 tausaga ua mavae. Peitai o le tulaga maualuga o tupe maua mai i pisinisi tau fesootaiga, ae maise lava i le auaunaga tau telefoni, faatsi ai ma le faatupulaia o kamupani i lea lava auaunaga, ua avea ai le manao ina ia fuafuaina ia talafeagai tulaga tau tupe maua i tupe faaalua, ma faatonuga o le alagatatau ona toe iloiloina le tau o laisene ma isi totogi o ia auaunaga tau fesootaiga.

O tau o i ai nei ua maualalo tele ma e le o mafai ona atagia ai le tulaga moni o faiga faapisinisi, i le tuuina atu o laisene ma le faaaogaina o alaleo leitio mo fesootaiga. E tatau lava ona atagia i ia totogi o laisene le taua o nei auaunaga, ma e tatau foi ona avea ma lapataiga mo i latou ua na ona fia auai i ia pisinisi mo letulaga tau tupe maua, ae leai se agaga moni mo le fia atinaeina ma le faatinoina o se auaunaga aupito sili ona lelei mo Samoa.

Ua faatupulai pea le tau o masini fou ma meafaigaluega tau fesootaiga i totonu o le sefulu tausaga ua tuanai atu. I lea foi la tulaga e tatau ai lava ona siitia le tau o laisene ma nisi totogi e moomia i ia itu, ina ia tulaga tutusa ma ni siitiaga o ia auaunaga e kamupani fou o loo gafa ma lo latou faafoeina.

10.7 Tupe Faatatau Faaagaga:

Ua manaomia tele le pulega lelei o ia faatinoga ona o le tulaga maualuga ma le uiga ese o le atinae i le auaunaga tau fesootaiga, ma e ua tuuina ai le tulaga faamuamua i le faatinoga o ia matafaioi e le Maagaluega. I lea tulaga e tatau ai lava ona talafeagai ma saunia ia lava ni ala'oa ina ia mafai ona ausia tapulaa ma sini ua faataootoina e le Matagaluega. E tatau lava ona lava ma talafeagai ni vaega tupe e ioeina i Tala o le Tupe a le Matagaluega i le lumanai, e faatupeina ai nisi tagata faigaluega faaopoopo ma faatinoina ai isi galuega atinae faifaiepa a le Matagaluega.


10.8 Fesootaiga Faa-va-o Malo:

O loo faaauau pea ona faaaogaina e le Matagaluega fesoasoani mai le Faalapotopotoga o Meli a le lalolagi ma le Iuni o Fesootaiga tau Fesootaiga tau telefoni a le lalolagi, faapea foi ma isi faalapototoga tau fesootaiga a le lalolagi ma le itulagi e pei o le PITA i mataupu tau meli ma fesootaiga. Mo Samoa lava ia, o le utiuti o ala'oa e pei o le manaomia o fesoasoani mai atunuu i fafo ma avanoa mo aoaoga, ma isi lava fesoasoani tau atinae, ua ala ai ona naunautai e fai paaga ma avea ma sui o nisi o nei faalapotopotoga o loo gafa ma mataupu tau fesootaiga a le lalolagai ma le itulagi e pei ona taua i luga, aemaise foi o le faamalosia o fesootaiga vavalalata ma nisi o atunuu i ona tulaga aotetele, ae faapea foi ma fesootaiga ma atunuu taitasi.

10.9 O Toe Teuteuga ma le Matafaioi Autu mo le Matagaluega i le Lumanai:

Ua amatalia ona faagasolo fuafuaga a le Malo mo le toe teuteuga o auala ma faiga Faavae aua le faaleleia o le auaunaga tau Meli ma Fesootaiga. Ua maitauina se suiga lelei ua tulai mai ina ua faatinoina le tuueseesege o matafaioi o le faatinoga o galuega tau meli ma Telefoni mai le fuafuaina ma le faatinoina o galuega tau Tulafono Faatonutonu ma laisene faapea foi ma le Pulega o le Fusi o Alaleo Leitio. Peitai e tatau lava ona faaauau pea le faatinoga o fuafuaga tau atinae a le Malo ina ia mafai ona tino mai lona faaunauga ina ia galulue vavalata ma kamupani faipisinisi tutoatasi mo le sini o le atinaeina ma faaleleia atili le auaunaga tau fesootaiga. E manaomia le faaauauina o le faatinoga o le auaunaga tau fesootaiga I le faatauaina ma faavaeina i le tulaga o iai le maketi poo tagata lautele o loo latou faaaogaina ia auaunaga. Peitai o le a le mafai lava ona sologa lelei le atinaega o ni faiga faatauava, pe afai o le faaumiumi pea ona iai i le tulaga e faatinoina toatasi ai e se kamupani le tele o ia auaunaga.

O loo tele pea ni galuega faatino a le Matagaluega e tatau ona faaauauina e tusa ma aiaiga ma faagasologa o lana Fuafuaga mo le Faafoeina o Galuega o iai nei. Ua atagia mai se autasiga e tuuina ai le faamuamua i vaega o loo moomia tele ni suiga. E tusa ai ma le faatalanoaga i vaega ua muamua o Tulafono Faatonutonu ma le Pulega o le Fusi o Alaleo Leitio, o loo tele faiga e mafai ona faatinoina ai le pulega o ia matafaioi e fuafua i le ituaiga Faiga e filifilia. O le tulaga tau amata o loo iai le faavaeina ma faatinoina lelei o nei matafaioi, faaono fautuaina ai se fuafuaga faaeteete ma le toto'a ina ia mautinoa ai le faafaileleina o ia taumafaiga aua le tulai mai o se siomaga talafeagai ma le tusaafia i le pulega o ia matafaioi.



O le galuega tele o le faafoeina lelei o le faaaogaina o ana ala'oa utiuti o loo iai nei, ae maise i le atinaeina ma le faatonutonuina lelei pea o Aiaiga Faavae, ua faatulai mai ai mo le Matagaluega se anoano o faatinoga e tatau lava ona tulituliloaina i le malosi uma lava ma fuafuaina i taimi faatulagaina. E le tatau lava ona faavaivaia lea faatatauga pe ta'u faatauvaaina foi ona o le to'agaogao o se aufaigaluega e iai le tomai ma le agavaa atoatoa, faapea foi ma le utiuti o tupe aua nei faatinoga.

Ua iai le faamoemoe o le taunuuga o le galuega a le Matagaluega i ni nai tausaga o muamua o le taliaina lea o le Aiaiga Faavae mo Fesootaiga a le Atunuu, lea ua maea nei ona tuuina i le Kapeneta i lona tulaga faataitai ma ua ioeina e avea ma Pepa Galue mo le toe atinaeina ma faaleleia atili. O le itu lea e tatau ai lava ona faamalosi ma faaauauina galuega sailiili ma suesuega mo faamaumauga a le Matagaluega. O le a tuuina foi le faamuamua i lomiga faavaitaimi e pei o Fuafuaga mo le Faafoeina o Galuega ma le Faasologa o Galuega Faatino a le Matagaluega e lipotia ai ma faamatalaina le tulaga ua iai ia faatinoga.

11. Faafetai

E fia faamauina le faafetai tele ma le faamalo i isi Matagaluega ma Faalapotopotoga a le Malo, Faalapotopotoga faa-va-o-malo ma le faa-itu-lagi, ona o le fesoasoani ma le lagolago mai i le faatinoga o galuega a lenei Matagaluega i lona uluai tausaga talu ona faavaeina mai. E momoli foi le agaga faafetai tele ona o le lagolago mai ma le fesoasoani mai le mamalu o tagata taitoatasi ma Faalapotopotoga ma Kamupani eseese e aafia i lenei matafaioi faapea foi ma le atunuu lautele i le tausaga muamua lenei o la matou auunaga.

E faapitoa le agaga faafetai ma le faamalo i le Afioga i le Palemia, o le Afioga foi lea i le Minisita o Mataupu tau Meli ma Fesootaiga faapea le mamalu i le Kapeneta mo la latou faamalumaluga ma faaiuga na lagolagoina ai le pitolaau a lenei Matagaluega i le tausaga muamua o ana galuega.